



Caderno da crítica

Cuestionario Proust: Manuel Gago

[Ramón Nicolás 7 Novembro 2016](#)

1.– Principal trazo do seu carácter?

– O entusiasmo e o seu derivado instrumental, a paixón.

2.– Que calidade aprecia máis nas persoas?

– A franqueza.

3.– Que agarda das súas amizades?

– Que paguen de cando en vez as cañas e os viños, para que así tamén llas poida pagar eu a eles, nun círculo sen fin de alcol, conversas e retruques.

4.– A súa principal eiva?

– Se cadra a dispersión.

5.– A súa ocupación favorita?

– Botarme ao monte.

6.– O seu ideal de felicidade?

– A miña parella, unha boa botella de viño, e un serán vizoso na Casa de Barcia.

7.– Cal sería a súa maior desgraza?

– Que se me truncaran os proxectos nos que máis ilusión poño.

8.– Que lle gustaría ser?

– Un penedo no pedregal de Esteiro. Un cabalo ceibo no Xistral.

9.– En que país desexaría vivir?

– Seis meses aquí (ese amplo aquí de toda Galicia) e seis meses aló. E aló pode ser Nova York, Sarlat-la-Canéda, Capu di Fora, Castell'Arquato, Douarnenez, Portree..., lugares onde fun feliz.

10.– A súa cor favorita?

– Ando entre o vermello e o ouro vello.

11.– A flor que máis lle gusta?

– A hortensia, as florciñas do cardo e da uz.

12.– O paxaro que prefire?

– O corvo.

13.– A súa devoción na prosa?

– Faulkner. Lobo Antunes. Eça de Queirós. Cormac Mc Carthy. Cunqueiro. Baricco.

14.– E na poesía?

– Seamus Heaney. Ramiro Fonte. Omar Khayyam.

15.– Un libro?

– Dos últimos, *O tempo dos agasallos*, de Patrick Leigh Fermor. De sempre, *O memorial do convento*, de Saramago.

16.– Un heroe de ficción?

– Ulises.

17.– Unha heroína?

– Jessica Jones.

18.– A súa música favorita?

– Estes días ando saudoso. Poñamos 'L'Appuntamento' de Ornella Vanoni.

19.– Na pintura?

– Francis Bacon.

20.– Un heroe ou heroína na vida real?

– Alan Turing.

21.– O seu nome favorito?

– Aldara.

22.– Que hábito alleo non soporta?

– O reviradismo.

23.– O que máis odia?

– A inxustiza. Os remorsos.

24.– A figura histórica que máis despreza?

– Os superviventes a calquera cambio de poder.

25.– Un feito militar que admire?

– A resistencia final das Irmandades na Lanzada. Sete labregos e mariñeiros resistindo nun castelo en ruínas, durante unha semana, ás forzas de Pedro Madruga, en 1469. Un feito tan heroico como descoñecido.

26.– Que don natural lle gustaría ter?

– O da palabra exacta no momento axeitado

27.– De que maneira lle gustaría morrer?

– Coa sensación de que queimei gozosamente case todos os cartuchos.

28.– Cal é o seu estado de ánimo máis habitual?

– A fervedura.

29.– Que defectos lle inspiran máis indulxencia?

– O orgullo.

30.– Un lema na súa vida?

– O mesmo que Cela: Resistir é vencer.